

GWALARN

PAJENN

Roparz Hemon. — PEURUNVANI.....	5
G. B. Kerverziou. — AN DIRI-SERVIJ.....	9
Meavenn. — AN HINI BIHAN.....	17
T. GWYNN JONES.....	20
BREZONEG AR VUGALE.....	25
LEVRIOU NEVEZ.....	26
GERIOU-KROAZ	29

33

EOST 1931

Gwalarn

Niv. 33

7-vet Bloavez

EOST 1931



PAJENN

Roparz Hemon. — PEURUNVANI.....	5
G. B. Kerverziou. — AN DIRI-SERVIJ.....	9
Meavenn. — AN HINI BIHAN.....	17
T. GWYNN JONES.....	20
BREZONEG AR VUGALE.....	25
LEVRIOU NEVEZ.....	26
GERIOU-KROAZ	29

Peurunvani

Eur wech ar mare e vez klevet n'eo ket unvanet c'hoaz a-walc'h ar brezoneg unvan. Ha gwir eo, e meur a geñver. Hen lavaret hon eus ouspenn eur wech. A zo gwelloc'h, klasket hon eus penaos peurunvani, evit startaat al labour bras diazezet gant eur rummad skrivagnerien, Fransez Vallée en o fenn.

Evit startaat, a lavaran, ha n'eo ket evit distruj.

O komz eus ar beurunvanidigez-se, — da lavarout spisoc'h, o komz eus an doare da dostaat ar brezoneg unvan ouz yez lennegel Gwened, — setu ar pez a skriven e niverenn-c'hoañv *Gwalarn* 1928 :

« *Klasket e oa bet betek-hen, a gredan, da unvan ni an diou yez, kendeuzi o doare-skriva. Lavarout a reomp : an dra-se eo a dleer ober d'an diwezata. Lezomp pep yez gant he doare-skriva d'ezi hec'h-unan. Digalonekaat an dud n'eo ken, beza atao o kemma neuz ar geriou. Arabat mont da lakaat strafuilih adarre en eun dra a zo diazezet mat. En amzer-mañ, dreist-holl, ma vezet a-zevri o sevel levriou-skol, levriou-gouiziegez, h. a., ne vefe ket brao c'hoari ha koll amzer evel gwechall gant an doare-skriva.*

« *Greomp an unvaniez tamm-ha-tamm, avat, dre*

gemer e pep yez lennegel geriou ha troiou-lavar eben, ar re dalvoudusa dreist-holl, ken na zeuint da veza an hevelep yez gwisket e daou zoare disheñvel. Neuze, trec'het e vo marteze eun doare-skriva gant egile, marteze e vo kavet mat o c'hendeuzi, marteze e vo ijinet eun doare-skriva nevez. Petra 'vern, gant ma vo saveteet ar Brezoneg, war an dachenn a zalc'h hizio, hag a rank derc'hel bepred.»

Ar pez a skriven e 1928 a zo chomet gwir e 1931. Gant eur c'hemm, avat. Abaoe an amzer-se, kresket en deus c'hoaz bagad ar geriou gwenedek implijet e brezoneg unvan. Eun tammig hepken, evit gwir. Eur tammig bihan, ma karer. Hogen eun tammig atao. Ha pa lavaren, e derou ar bloaz-mañ, « *teir rannyez dreist-holl* (en oberidigez ar brezoneg lennegel) a zo bet medet enno : *hini Leon, hini Dreger, hini Wened* », ne oa ket hep gwir abeg.

Lennomp koulskoude eur skrid gwenedek bennak. Nag a c'heriou c'hoaz ha n'int ket bet degemeret er yez unvan ! Geriou brezonek, evelato, geriou mat, geriou gwelloc'h a-wechou eget ar re boazet en hanternoz, — Treger pe Leon, — geriou hag a ra diouer d'ar yez, eur vleunvegad founnus a gened hag a binvidigez. Keuz a zeu d'imp neuze, o veiza pegen dister eo ar pez hon eus kemeret e-kichen ar pez a zilezomp. Hag e sav raktal eur menoz d'hor spered : perak ne vez ket gwelloc'h

anavezet e-touez ar vrezonegerien rannyez Wened ? perak ne dremen ket buanoc'h geriou Gwened e yez an holl ?

Ar respont, evel atao war dachenn ar brezoneg eo : diouziegez ha lez-ober. Rak ne dalvez da netra lavarout : mat eo kemer geriou Gwened. Ne dalvez da netra dreist-holl tamall hemañ pe henhort. Ar pez a dalv eo studia ar gwenedeg a-zevri-kaer, ha goude, e imbouda war gef ar yez unvan a-zevri-kaeroc'h c'hoaz. Keit ha n'o devo ket kemeret tud an emzao lennegel al labour-se etre o daouarn ; keit ha na vo ket bet bleniet an alar *gant ar youl da zisoc'h* ; keit ha na vo ket bet, berr-ha-berr, *sevenet eun dra bennak*, aner e vo lavarout, aner e vo breuataat. Koulz e vezoo sutal.

Abaoe bloaveziou m'omp bet trechalet gant ar gudenn-se, n'hon eus ket kollet hon amzer. War-bouez burutella levriou, kelaouennou ha geriaduriou Gwened, savet hon eus roll ar geriou gwenedek, a dle, d'hor menoz, dont da veza anavezet hag implijet dre-holl. Eur roll hir eo. Ober a raio danvez niverenn *Gwalarn* ar miz a zeu, dindan an ano a : *Teñzor ar Gwenedeg*. Bez' ez eus endeo, evit gwir, geriaduriou klok ha graet-mat eus rannyez Wened. Hogen skrivet int en eur yez estren, ha ne rannont ket splann ar geriou boazet e Breiz-Izel a-bez diouz ar geriou gwenedek a-ziforzh.

Eur wech embannet ar skrid-se, ne vo ket echu hor poan. Ret e vo d'imp, tamm-ha-tamm, lakaat ar geriou dibabet evel-se da dalvezout. Ne vo ket graet en eun taol. Kemer a raio meur a vloaz. Tud a vo kavet adarre da herzel pe da c'hoapaat. Adarre e vo lavaret gant ar yezoniourien ez comp « a-enep displegadur naturel ar yez »: Hag adarre e vo dizo-loet en diwez e oa ar wirionez ganimp-ni.

Rak bez' ez omp storierien vat, storierien fur ha lemm o sell. An dra hon eus gounzet, — reizidigez an doare-skriva ha diazez eul lennegez vrás, — an dra-se a fell d'imp mirout, o teurel a-gostez kement skoilh a sav. En abeg da se omp kreñv.

Merzout a reomp, avat, hor gwanderiou iveau. Gouzout a reomp ar pez a zo bresk en hol labour. Ha striva a reomp, gant hon holl c'halloud, da stanka an toullou, hep diskar ar pez a zo start ha padus.

Roparz HEMON.

An Diri-Servij

« An nefiv a zo anezañ eur palez skedus,
ne deer d'ezañ nemet dre ziri-servij digalonekaus. »
R. REVERDY (Ar Vaneg Reun).

(Bez' e red an aber e straedou eur gérig, deuf teñval gant eur serr-noz diskar-amzer gell ha leun a zouster. O c'hlevout a reer o komz hag o kerzout, hag e teuont war wel [1].)

A. Ar ganenn-se, linennet-eeun, kalongemerus,
a zisplege d'imp bremañ-souden,
'n eur beurverka ster an danevell

(1) Kement-mañ n'eo nemet eur varzoneg. Eur fazi e veze gwelout ennañ derou eun arvest bennak ; danvez evit eun arvest ne lavaran ket. Marteze e vo savet diwarnañ eur pez c'hoari : anavezout a ran eur plac'h hen grafe mat ; hogen n'hen hetan ket. Stumm ar varzoniez a wiskas faltazi va ene p'edon war voule'ha « An Diri-Servij », — ne fello ket d'in eta gwelout eno nemet an dra brizius-se a anver an awenvarz. Roparz Hemon a c'houlenne a-hend-all eur varzoneg vrezonek savet war c'hoari mentet an taol-moquez : setu, d'am meno, eur skouer eus ar pez a c'helliñ bout graet ; daoust d'ar stumm beza pell diouz doare-menta ar Re Goz, daoust da zireoliez ar gorre ; ouspenn e klaskis rei da bep tridenn eul *leit-motiv* mentadurel : n'ouzon ket mat ha tapet em eus ar pal. Eun dra am sura : mentaduriou a zo a c'hoarie em ene abaoe pell, a zo amañ dieubet, hag e plij d'in va oberenn dre m'em sikour mat en adreizadur diehan va *Me kemmus-mor*, neuz ha gwiskamant va *Heñ dounoc'h*, stabiloc'h ha diziskleriusoc'h. — KERVENZIOU.

talvoudekaet gant an drolinenn-son,
a laka d'in hervez boem doum an anao sakr-se.

- B. Da natur virvidik,
o trivlia dindan galvadou kevrinleun,
n'hell nemet o zañva, —
hag en doare divat,
dre ne welez eno nemet ar ster barzonek, ar
[ster-den,
p'eo ret gwelout eno ar ster a wirionez,
ster doueel, gwir nemetañ.

C. Dre m'Oc'h Barzoniez, Doue ha Nemedoc'h.

- A. N'hellin biken kavout ar ster gwir-se.
(Eur baouezadenn.)
Setu aze komzou a ra ennoun bleunia peoc'h
[ar galon,
ha neuze 'c'houez avel an diskredi
hag e c'harm mouez an dic'hoanag
ha n'hell ket va buhez trubuilhet adkavout
[he c'hempouez.

- B. Kempouez diskleriet-mat dre vouez ar ganou-
[rien,
e skeud beo ar peuliou koz,
o tirolla
hep 'n em skuiza
gant o aked brasa
danvez prizius ar pedennou
a gelc'h an ograou gant eur sked treuzwelus.

- A. Evel em eus karet en desped d'in fenoz
kement achanterez

ganet ennoun dre nerz ar sonerez,
o lakaat da sevel dirak va daoulagad trellet
gweledigeziou dic'hourfenn,
korfou yaouank ha glan
o linenna o heuliadou war strad sklaer kuzz-
[heol moriou kreizdouarel !

- C. Evel bangor an holl aelez
a zle kenaiza eur veuleudi varzus
d'an Doue tri-hag-unan !
(Kanou yaouank a leugn an aer gant
eur finvadenn skañv.)

- A. Gallout, Aotrou,
divuna dre varziou ar relijion-se
marziou marzusoc'h c'hoaz,
banvez an eneou bodet dirak Ho Hollc'hal-
[loudegez !
Gallout rei, evel ar re-mañ,
eur ster dreistnaturel d'am goanag ha d'am
[c'hoant !

Merzout ez eus
dreist Ger an Den ha Karantez ar C'hig
ho Ker diharz e dounder an islonk,
e tañvaint E saour iskis, —
ho Karantez diharz,
e ouezint he douster iskis.
Ha me, paour kaez diot, —
uzet amañ ganin nerz ar c'hoant hor bount
[davet an All
a virimp 'n hor c'hichen,
a raimp d'imp-ni betek midlendall kevrinusa
[Hec'h ene,

a vez danvez hon danvez,
 stummet 'n e zistera degouez dre skinerez eur
 [c'hoant
 keneilgeriet gant c'hoant gwrezus an All, —
 pelec'h e vin neuze ?
 ha pe war hent poanius
 e kerzo, e noz-skourn an dilez,
 va ene paour ha glac'haret ?
 Rak e welan bremañ
 ar spez a groue ar spered pennfollet gant e
 [anken
 o kemper eur furm-gig evit va zemptadur,
 ha me o rei d'ar falsdoue va c'halon ha va
 [c'horf...
 ha maro 'vin neuze 'vidoc'h Aotrou !
 (Oc'h addont en e skiant.)
 Ne gredan ket e Doue !
 Ne gredan ket er goanag dreistdenel,
 hogen e spi an den : karout...
 Penaos ? Skuiz-marv e voen
 dre 'm boa klasket ar genfiziañs ha n'em boa
 [ket he c'havet.
 Den ne felle kredi ennoun
 ha ne felle ket d'in kredi er Gwirvoud dreistel
 [spurmantet.
 Bez' e leñiven :
 dre 'n anken, dre 'r morc'hed, dre ar c'hoant ?
 [n'ouzon ket.
 Eun deiz e ouezis ez ae d'ar beure d'an iliz-
 [veur :
 eno 'm eus he gwelet o pedi ken deol,
 gant kement a veoder,

em c'hichen-me leun-barr eus an amgredoni,
 m'em eus roet d'ezi va buhez holl
 p'eo troet davedoun he sellou, —
 p'eo diskennet eus ar c'hustodig aour,
 braoig-metal kizellet,
 an Hini a azeulit, hag a zo tremenet 'n hec'h
 [ene,
 braoig-beo, aourvaenig-beo.

B. Nag a levenez evidout, birvidig,
 da verzout an emgleo kevrinleun o stumma
 'tre daou ene,
 eun deiz 'vel deiziou all,
 m'en deus lies hini gwelet 'met ar vuhez peur-
 [zisliou.

A. Nann, dibeurzeblant ouz ar re all.
 Sed avat : eur jestr hag eur mousc'hoarz,
 eun dourn 'n em ro ha 'n em zilez,
 ma lusk gwaziennou hec'h arzourn gwenn
 an hevelep luskad hag ho kalon...
 C. Eur wech ez puhez
 (ni hon-unan, a lavaris, n'ez meizemp ket)
 ez pezo spurmantet o tont davedout
 Dieubourez an Deveziou Degas ;
 eur wech ez puhez,
 en eur prantad ezluskus-goulaouüs,
 ez pezo tañvaet an eurvad
 d'he gwelout o tont davedout-te,
 warni mousc'hoarz he c'huñvelez diharz o
 [lavarout hec'h ene karantezus.
 Ha koulskoude ez karomp iveau !

A. Foll oññ ha padal e karan !

B. Ha n'hellez ket ez pez eilgeria ouz ar garan-
[tez-se
ha gloazet out.

A. Gloazet oun, gwir ez eo, ha dounoc'h-doun
[atao.

D'in e fellfe garmi outi va dic'hoanag
he santout em c'hichenig,
evel ma klever kammedou en dic'houlou
ha n'ouzer ket ha n'emañ ket an ael,
pe 'n diaoul ouz ho heulia,
tost-tre da drella ho kalon gant eun adluc'h
[re veo...

C. ... ma welfes enni da druilhegez.
Hen gouzout a ran mat, hogen al louzaouenn
[ivez.
Va list da lavarout d'it-te da lorc'h ha da
[wanded :

Ne vennez ket pedi, —
pedenn divalc'h kevrin ar galon,
a sun en eiennou fresh ar Garantez-Doue holl
[ar Peoc'h, —
ar Peoc'h-se a zo anezi
balzam an ene gloazet,
goulou 'n ene difeizet,
skor an ene a drabidell, —
a ya war vrasaat, war emledanaat,
evel eur wagenn veoder o vont d'an Dazont
[dizefreizusaet
hag o ruilha...
En em lezel da vez a fiziant dindan sell true-
[zus an Tad !

B. Sell an noz o tiskenn kevrinus,
amluc'h glas
m'emañ ene an Traou war vordo
'vel eun aezenn enni,
ma valzamus ene ar Bed evel eul lestr-
[ezañsa, —
amluc'h glas, amluc'h glas,
glasoc'h-glasa bremañ,
glas-moug, glas-du,
du-glas ha bremañ duet-holl,
darkness and silence...
Ar beo a glever o pedi Doue kent moredi.
Didrouzder, peoc'h divent an abardaez fron-
[dus,
ma ruz, ispilhet ouz spilhennou aour-beo,
limestra eul lost-vroz eskobel,
e-touez c'houez dilorc'h ar melion...
A, sorc'hi ennout al luc'h !

C. Deiziou 'zo
e santez o sevel ennout
ar Feiz a viromp evel eun teñzor,
dasorc'het marteze gant fromadenn ken kuñv
al levenez hon dalc'h
pa sellomp ouz lidereziou marzus.
Neuze, m'hellfes stoui, en emsujidigez da
[Youl anTad !

A. Pa ne santan ar Youl a sked gwrezus ennoc'h,
penaos azgouleñ levenez ?
Da dud trist an anken.
An anken a zo mat, emit-hu ?
Ster gwir he madelez a zo kuit diouzin, 'vat.

Ha mont a ran da strebotti ouz harz va c'ha-
[rantez korfel
am goulenn em pez.

B. Evit mont davet ar vuhez ledanoc'h
ez out galvet eviti
(rak merket doun e luc'h war da ene an
[arouez-dilenna])
n'eo tra eus pez az talc'h eun harz,
hogen eun derez,
ha daoust d'it e savez davet an Hini-se
a zoug en E zaouarn hor buheziou.

C. Daoust d'it, kile, e kerzi evel-se davet ar
[Goulou ;
ken kreñv eo-hi, avat, e wilc'hez c'hoaz
hag en em nac'hez ouz skinerez ar flammen-
[neg veo-se
a ruzia ar valvenn treuzluc'hus.

B. Ne deus nemet da lavarout :
Va doue, va harpit da lemel kuit ar skramm !
hag ar goulou en em ziskouez
a vir ouzit a vont da steki ouz an dereziou da
[heul.

A. A ! Disteurel ha bruzuna ar skramm a lorc'h !
chom hep lavarout ken :
ouz dasson va mouez e tregern eur galon,
hogen :
gant he fedenn e vesk va ano, a Zoue !
Va Doue...

G. B. KERVERZIOU.

An Hini Bihan

Hanter-kant bugel am eus, ha teodou hir d'ezo.
Hogen, kredi a ran ez int holl aelez vihan diskennet
eus an neñv evit va flijadur. Holl ? Anat eo n'eo ket
gwir. Kaer am eus klask en hemañ an ael bihan pe
vras, — ne gavan nemet eul loen drouk evel ki
gouez va moereb.

Sed aze ar pez am eus lavaret n'ouzon pet gwech
d'am Renerez, e-pad m'eo chomet Perig Abalan em
skol.

Perig !

Eur fri lous gant kleier hir o ruilha war e vuzel-
lou, daoulagad glas louet kuzet gant bleo ruz a-fuilh
war e zioujod, bragou a oa bet du gwechall, —
hogen Perig en doa ruzet e-barz meur a gleuz kent
dont d'ar skol bemdez ! — hag eun davañjer re hir,
a oa re verr evit e c'hoar hena.

Perig ! Truez va skol !

Ne felle d'ezañ na skriva, na lenn, na c'hoari
gant ar re all. Eun dra hepken a blije d'ezañ : ober
netra, netra 'vat eo. Rak bemdez e teue ar yugale
da ziskouez d'in eur c'haiier freuzet, — eul lev
louzet,, — ha pelec'h emañ va botou-koad ? — ha
pelec'h emañ va gwestell ?

— Perig ? Pelec'h emañ ?

Eur mousc'hoarz evit respont, — eur mousc'hoarz
karantezus, — Netra ken.

Ha pa zeue an eur da lenn !

— Perig, sell ouz ar vaz am eus graet war an dao-lenn du. Peseurt lizerenn eo ?

Perig a vousc'hoarze, hag a lavare en eur vousc'hoarzin : O pe A pe ne vern petra nemet I

Amzer an danevellou.

Prinsezig an Dour a zeue e-barz ar sal deñval gant he mignon Lagad-Teo, hag evit he gwelout gwelloc'h, evez bras a leunie daoulagad va bugale. Perig, heñ e-unan-penn, a chome dizeblant ha meur a wech e veze garnet a-daol-trumm :

— Ai ! Ai !

Amezeien al lakepod o doa tañvaet eur wech c'hoaz an douster da vez en e gichen.

Koulskoude, eun deiz heoliet (Kredi a ran e levezon an heol...) eur burzud bras a c'hoarvezas war an douar. Pa sellis ouz daouarn Perig er mintin, gwalc'het e oant bet. A-hend-all, an hini bihan a oa en e renk pa sonas ar c'hloc'h.

Evit e galonekaat, e rois d'ezañ eur skeudenn livet e gwer, — liou ar goanag savet ennoun dioustu.

Siouaz ! Dek gwech siouaz !

Freuzi a reas ar skeudenn kerkent ha roet d'ezañ, — hag e voe drouk evel Morse a-hed an devez.

Hag en em c'houlennis pegoulz e kavjen hent e galon ? Biken, — biken.

Ar yaou a oa laouen, — tremenet e-kichen va zud.

D'ar gwener pa erruis evit seni ar c'hloc'h, eur paotrig a zeus davedoun, gant eun neuz c'hla-charet :

— Dimezell, — Perig Abalan, — eur c'harr-dredan, — maro eo, o deus lavaret...

Maro.

Adwelout a ris dremm Perig goloet gant bleo ruz, — hag e vousc'hoarz, — gloazet e voen.

Biken ne gavin hent e galon.

MEAVENN.

T. Gwynn Jones

Sellet e vez gant kalz tud an Ao. T. Gwynn Jones evel brasa barz Kembre an amzer-mañ. N'omp ket barrek c'hoaz, siouaz, da heulia mat e Breiz emzao lennegel ar Vrezoned tramor. Eun ano evel hini T. Gwynn Jones ne dlefe ket neouac'h beza dianav en hon touez. Trei a reomp eta, evit lennerien Gwalar, eur pennadig embannet e niverenn Y Ford Gron miz mezeven diweza.

Darvoud pouezusa ar bloavez-mañ er bed lennegel kembraek a vo embannidigez holl oberou penna T. Gwynn Jones en eur rummad levriou a hevelep stumm.

E Bangor e vo an Eistedvod Vroadel hevlene. Pa voe e Bangor e 1902, an Ao. T. Gwynn Jones (a oa e Kernarvon neuze) a c'hounezas ar gador gant e odl vrudet, *Tremenvan Arzur*.

Rei a reas an odl-se eun emlusk nevez da varzoniez Kembre. Bez' e voe « trompilh an dihun », koulz lavaret. Eur pont e voe a-us d'ar gouelec'h a zo etre lennegez hon amzer ha lennegez klasel koz hor broad. Degas a reas en-dro spered ar romantou koz.

Bras e voe efed *Tremenvan Arzur* war dud yaouank an amzer-mañ, hag e vleunias barzed evel an

Ao. R. Williams Parry, an Dr. T. H. Parry-Williams, ha Hedd Wyn dindan he levezon.

Sir John Morris-Jones (1), a oa unan eus barnourien *Tremenvan Arzur*, a lavaras en doa merzet, goude lenn odl an Ao. Gwynn Jones, e oa ar pez en doa gortozet ha goanaget o paouez c'hoarvezout.

Kelenner Lennegez Kembraek e Skolaj Abers-touez eo an Ao. T. Gwynn Jones abaoe meur a vloaz, hag eus 1902 betek bremañ, skrivet en deus hep arzao gant eun oberiantiz sebezus.

Eun dra iskis eo avat gwelout pegen diaes eo kavout e benna oberou lennegel hizio. Embannet eo bet e *Ganennou* brao-kenañ gant « Gwask Gre-gynog » n'eus ket pell, hogen koustus eo al levr, ha n'eus ket bet moulet kalz skouerennou anezañ. Ne c'hell ket n'eus forz piou a gar al lennegez e brena.

E gwir, ne gomprener ket perak e vefe ken diaes kavout skridou hor pennskrivagner. Hevlene, avat, emeur oc'h embann e oberou (barzoniez ha pennadou-skrid) e c'houec'h levrenn. Dont a raio an hini genta e-maez a wask er miz a zeu.

(1) Sir John Morris-Jones, maro n'eus ket pell, a zo bet reizer hag adsaver ar c'hembraeg, evel m'eo bet an Ao. Vallée reizer hag adsaver ar brezoneg. Setu amañ ar pez a lavar an Ao. Saunders Lewis diwar e Benn : « Boulc'ha a reas al labour herkulec a adsevel skoueriou lennegel ar c'hembraeg klasel. Reiza a reas an doare-skriya, hag adrei a reas d'an yez reolennou he c'hevreadur. Bez' ez eus hizio, evel er 15-vet kantved, eur c'hembraeg lennegel, a rank beza anavezet gant pep skrivagner, ha John Morris-Jones eo en deus e zaskoret d'imp. » Meiza a reer gant pebez levenez e welas an den-se dasorc'hidigez al lennegez, dam-vouget eus ar 16-vet betek derou an 20-vet kantved gant dourn ar Buritanenez.

Traouigou a vo hec'h ano. Enni e vo dastumet darn eus e varzonegou gwella.

Neuze e tevio *Brudou*, eun dastumad skridou diwar-benn Kembreiz vrudet e amzer. Gwirheñvel eo e vo lennet al levrenn-mañ muioc'h eget an hini a vœu embannet pell 'zo.

Goude se e teuy e *Ganennou*.

Goude, diou levrenn *Studiadennou*, — pennadou diwar-benn Dante, Don Quijote, Uhland, Tennyson, ha skridou a-zivout traou e-giz « Hon Amezeien ha Ni », « Levriou Yaouankiz », « An Templ Kuz », — pep unan anezo o tigeri d'imp en eun doare boemus bedou disheñvel a sevenadurez.

Ar pempvet levrenn a vo *Barnerez ha Predererez*. Setu amañ darn eus ar skridou a vo enni : « Barzed ha Pec'herien », « Skriva eur Gontadenn », « Kenganez », « Kembre hag ar C'hoariva », « Engleña », « Keñveria », « Peuliadou Moged », « Eun Den hag eun Den All », « Kanennou Karantez ».

Neuze e vo eul levrenn flemmganou, ha marteze el levrenn-se iveauz darn eus troidigeziou kaer-dreist T. Gwynn Jones diwar an alamaneg, an iwerzoneg ha yezou all.

Ganet e vœu T. Gwynn Jones e Gwyndrig Uchaf, Betws-yn-Rhos, e kontelez Dinbec'h e 1871. Skoliet e vœu e Koloen hag e Dinbec'h, hogen e-unan penn e chounezas an darn vrasa eus e zeskadurez. War a lavar iveauz, dleout a ra kalz da Emrys ap Iwan (2).

(2) Emrys ap Iwan, maro e 1906, a zo bet diaraoger an dasorc'hidigez lennegel a hizio. Heñ eo a skrive : « Al lennegez c'han n'he deus ket muioc'h da ober gant skiant ar vuhezegez eget ar jédoniez c'han. »

E-pad eun nebeut bloaveziou e labouras evit kelaouennou e Kernarvon. Goude e kemeras eur garg el Lenndi Broadel en Aberstouez. Eno e reas kenteliou er Skolaj diwar-benn lennegez Kembre. E 1920 e vœu anvet da Gelenner.

Ouz ar pennad-mañ, na ra nemet sellout ouz an diavaez, stagomp al linennou-mañ, tennet eus levrig speredek an Ao. Saunders Lewis, An Introduction to Contemporary Welsh Literature (Raklavar da Studi Lennegez Kembre an Amzer-mañ) :

« ...al lennegez kembraek oc'h adsevel he devoe daou bal da genta : adkavout hec'h amzer dremenet hag addarempredi rag-eun Europa... »

« An emzao deraouet evel-se a-enep red holl venoziou Kembre an amzer-bremañ a dlee kaout dirazañ enebiez da genta. Akademiel e oa, amwerinell, o tifenn ar ouziegez hag an dreistez, hag ar werin he deus kasoni ouz kement a zo divoutin. Pa zeuas eta ar barz nevez, ar barz a c'helle dont bremañ ma edo diazezet an emreoladur hag ar yez nevez, e kavas en doa da veva, — da ampresta unan eus lavarenou Maurice Barrès, — « dindan daoulagad ar Varbare ». Hag evel den romant Barrès, e rankas sevel d'ezañ e-unan eun tour olifant, hag eno trei gwrez e galon ouz an embrederez. Bez' e oa diskibl Emrys ap Iwan, hag e skrivas diwezatoc'h e vuhez. T. Gwynn Jones. Rac'h e varzoniez a zo minic'hi eun arzour, eur bed dreistel, eur gwarez ouz ar filistinez a dro-war-dro, eun tour oli-

fant aozet eskuit meurbet. Ne ra ar boemour-se nemet gant an danvez prizusa, geriadur barzed vrientinel ar Grennamzer, muzuliou ar werzaouien glasel. Eun dec'hadenn eo e holl varzoniez. Testenn pep unan eus e oberou penna eo ar gwenva keltiek, Avallon en e *Dremen van Arzur*, Kembre an Huñvre en e *Vro ar Runiou*, *Tir Na n-Og* en e bez'-c'hoari e gwerzennou, *Douar en Hud* ar bugaleerez hag an natur, Enez ar Wenvidien e *Madog ha Koad Brekilien*. Tolzennek, frammet-start eo e labour, pep barzoneg nevez o staga eur gazel ec'hon ouz e Di-Meur an Arz. Diaes eo e varzoniez. Eun den-a-studi eo ; derc'hel a ra kador al Lennegez Kembraek en Aberstouez ; ha da dañva ervat e skridou e ranker gouzout kalz a-zivout kembraeg ar Grennamzer ha harzoniez Iwerzon. Keltiek-rik eo e awen. Skrivet en deus tri levr skridvarnouriez ha kalz studiadennou a-skign diwar-benn al lennegez iwerzonek. Peurlennegel eo e Labour, empennel kentoc'h eget trivliadel. Franceseo de Sanctis, ar skridvarnour bras italiat, a zifor'he ar varzed diouz an arzourien, o lakaat Dante e-touez ar re genta, hag Ariosto e-touez an eil re. Emañ Gwynn Jones e-touez an arzourien... Hag evel-se ez eo eur barz eus ar varzed, atao o studia gallusteriou e arz, oc'h arnodi muzuliou ankounac'haet hag oc'h ijina re nevez, bepred avat doujus evel eun den-a-studi ouz an henyoaz, bepred evel eur c'hrouer bras o karout peurglokted ar stumm. Embannet e vo hevlen eun dastumad eus e werzennou. Ha daoust na oar Europa netra a gement-se a-benn c'hoaz, eun darvoud europat e vezou koulskoude. »

Brezoneg ar Vugale

Setu amañ roll ar profou nevez hon eus bet :

Abeozen : 5 l. — Dre garantez Vreiz : 178 l. — Meavenn : 6 l. — en holl : 189 l.

Setu amañ roll al levriou kaset :

Ploueg-ar-Mor : 113 l. — Pempoul : 38 l. — Sant-Tegoneg : 135 l. — Brelez : 135 l. — Sant-Brieg : 62 l. — Plounerin : 135 l. — en holl : 618 l.

D'ar c'henta a viz gouere e chome e kef *Brezoneg ar Vugale* : 4.477 luriad.

Levriou Nevez

AR MARVAILHER ITALIAT, pemp kontadenn tennet eus *Dekamerone* Boccaccio, lakaet e brezoneg gant Alan Brenn, moulet e ti « Gwalarn ». — Priz (dre ar post) : 5 lur.

Setu amañ unan ouspenn eus skrivagnerien vrás ar bed troet e brezoneg. Piou n'en deus ket lennet, — ma n'eo ket en italiieg, en eur yez all da vihana, — ar c'hontadennou hollvrudet-se, fentus hep beza pounner, ha gadal hep beza hudur ? Bez' ez int, a gredan, en armel-levriou pep den desket, e-kichen Balzac ha Rabelais.

Eur blijadur eo adlenn e troidigez vrezonek Alan Brenn : *An Den Yaouank hag ar Gwazi, Kern evit Kern, Ar Chouer aet da Vondian, An Eostig hag Ar Paotr-Kezeg Fin*. Degaset o deus d'in soñj er marvailhou a veze boas eur person koz eus va anaoudegez, — eur santel a zen, daoust ma oa eun tammig « druz » e deod, — da gonta dirak eur ban-nac'hig *fin* goude koan, pa oa aet er-maez ar gara-basenn. Emañ Alan Brenn krenn a-du gant brezoneg ar bobl. Meur a wech omp bet skandalet gantañ, peogwir e oa re uhel, d'e veno, brezoneg « Gwalarn ». « Ne welan ket », a skrive d'in eur wech, « perak e tilezfemp geriou mat, netra nemet abalamour m'int heñvel ouz geriou gallek. Mar fell d'ar

brezoneg chom yez ar bobl, e rank dibab : lonka ar galleg, pe beza lonket gantañ. » Evel-se e kavomp e troidigez Alan Brenn : *prometi, amourouz, krial, mankout, espoir*, h. a., ha meur a dro-lavar dastumet war ar maez gantañ (ha, lavaromp ar wirionez, gant ar c'horonal Troude iveau). Koulskoude, — va c'heneil r'am digazero, — kavout a ran iveau en e labour gortozet gwerso gant an holl, hag a dle kemer lec'h an holl c'heriaduriou gallek-brezonek embannet, — ha diviet, — betek-hen.

En amzer-mañ dreist-holl, ma welomp oabl Breiz goloet a goumoul a bep tu, eur misi e vo al levrig-se, aes da lenn ha dibreder.

GRAND DICTIONNAIRE FRANÇAIS-BRETON, gant F. Vallée, skoazellet gant E. Ernault ha R. Le Roux, moulet a strobadou, Imprimerie Commerciale de Bretagne, 7, rue des Francs-Bourgeois, Roazhon. — Priz an dek strobad kenta (rakprenet) : 25 lur (C. C. 16.613 Rennes).

Setu embannet ar pevar strobad kenta eus al labour gortozet gwerso gant an holl, hag a dle kemer lec'h an holl c'heriaduriou gallek-brezonek embannet, — ha diviet, — betek-hen.

Ar strobad kenta a gaver ennañ :

1. Eur roll eus holl oberou Fransez Vallée, embannet ha diembann.
2. Eur c'hentskrid savet gant an embannerien, ennañ roll ar geriaduriou brezonek moulet betek hizio.

3. Eur raklavar a-zivout stummidgez hag implij ar geriou.

Kenderc'hel a ra ar raklavar betek war-dro kreiz an eil strobod. Ha neuze e teraouer gant ar Geriadur evit mat. Mont a ra ar pevare strobod betek ar ger *bruit*.

Graet em eus meuleudi ar Geriadur nevez a-raok d'ezañ beza moulet. Ar gwir am eus bremañ da bismiga.

Tri zra dreist-holl a damallan d'an aozerien :

1. Beza strollet ar geriou hervez an deveradurez, e-lec'h lakaat pep ger en e renk hervez al lizerenneg. Ha n'eo ket souezus e rankfed, da skouer, evit kavout *autopsie*, mont da glask *automobile* ?


2. Beza moulet ar geriou brezonek e lizerennou stouet, trellus d'an daoulagad, e-lec'h o moula e lizerennou sounn.

3. Rei ouspenn eun doare-skriva evit an hevelep ger. N'eus nemet eun doare da skriva *amañ, gwechall, iveau, h. a.* Stummou evel *ama, gwejall, ive*, n'int nemet trefoedach. E-keñver ar geriou gwenedek e kavan adarre ar fazi bras graet e meur a c'heriadur a-raok : o rei gant doare-skriva Gwened, evel ma vefent geriou estren. N'eo mat kement-se nemet da strafuilha an dud, da zistabila ar brezogneg unvan ha da lakaat ar Geriadur da goza ker-kent ha ganet.

Daoust d'ar faziou-se, ne c'hellfed ket lavarout a-walc'h pegen talvoudus eo al labour. Ne ouzon ket, e gwirionez, penaos e c'hellfemp e zioueri hiviziken.

R. H.

Geriou-Kroaz



A-led :

1. Parea.
2. Tro-war-dro d'imp.
Skop.
3. Garmi a ra (ar ran).
A-raok tenna gant eur fu-zuulh.
4. Tud ar bed-mañ.
5. Dozvet gant eun evn.
Kérig nepell diouz Kem-perle.
6. Karout a rin.
7. Bez' ez eo.
Muzul.
8. Talvoudus da domma.
Kempennadurez.
9. Ano eur plac'h en eur ro-mant.

A-sounn :

1. An eil re gant ar re all.
2. E porz eur vereuri.
Ar pez a glask kalz tud.
3. Reteriad.
Kana a ray.
4. Meurbet.
5. Ragano-gour.
Metal.
Ano-gwan-perc'henna.
6. Kontamm eul loen.
7. Brouda a ra.
Talvoudus da wriat.
8. Etre ar c'herzed hag an daoulamm.
Kement a zo divuhez.
9. War bevenn eur gêr vras.

Diskoulm Skoulmadell miz Mezeven :

BREIZAD
GRO N RUN
WIEN REGI
A NAVET V
LE RAK AL
A BEKED E
REUN DEAN
NAK D DEN
SALUDIS



Nevez embannet :

ROPARZ HEMON
EUR BREIZAD
OC'H ADKAVOUT
BREIZ
Priz (dre ar post) : 15 lur.

EMBANNADURIOU GWALARN

1926

J. Kerrien. — AR ROC'H TOULL. — Diviet.
J. M. Synge. — WAR VARCH' D'AR MOR. — 2 lur 25.

1927

Roparz Hemon. — AN AOTROU BIMBOCHET E BREIZ.
— 6 lur.
T. C. Murray. — NEVEZ-AMZER. — 4 lur.
TONKADUR BUGALE TUIREANN. — 4 lur.
G. Th. Rotman. — PRINSEZIG AN DOUR. — 5 lur.
GERIADUR GALLEK-BREZONEK A GORFADUREZ. —
Diviet.

1928

Aeschulos. — PROMETHEUS EREET, AR BERSED. —
12 lur.
B. Potter. — PER AR C'HONIKL. — 1 lur.
G. Th. Rotman. — PRINSEZIG EN DEUR. — 5 lur.
H. Andersen. — PLACHIG VIHAN AR MOR. — 3 lur 60.
Roparz Hemon. — GERIADURIG-DOURN BREZONEK-
GALLEK. — 22 lur.
Roparz Hemon. — YEZADUR BERR AR BREZONEG. —
3 lur.
Roparz Hemon. — DISTAGADUR AR BREZONEG. — 3 lur.
AR SIMBOL. — 0 lur 50.

1929

Meven Mordiern. — ISTOR AR BED, levrenn I. — 14 lur.
M. Gourlaouen. — LEVR AL LOENED. — 1 lur 75.
A. Blok. — AR PLACH' DIANAV. — 4 lur.
G. Th. Rotman. — NIJADENN AN AOTROU SKANVIG.
— 5 lur.
A. Brizeug. — TELENN ARVOR, FURNEZ BREIZ. — 6 lur.
Roparz Hemon. — REIZSKRIVADUR AR BREZONEG. —
3 lur.

EMBANNADURIOU GWALARN

1930

Meven Mordiern. — ISTOR AR BED, levrenn II. — 10 lur.
MARVAILHOU AR VRETONED. — 5 lur.
ENKLASK DIWAR-BENN STAD AR BREZONEG E 1928.
— 4 lur.
GERIADURIG ESPERANTEK-BREZONEK. — 4 lur.
Roparz Hemon. — EUN DRO E KEMBRE (Gwalarn 24). —
2 lur 50.

1931

Abeozen. — PEVAR MARVAILH (Gwalarn 28). — 3 lur.
Roparz Hemon. — EUR BREIZAD OC'H ADKAVOUT
BREIZ. — 15 lur.
OWEN HA LUNET (Gwalarn 30). — 3 lur.
DIARMUID HA GRAINNE (Gwalarn 32). — 5 lur.

AR MARVAILHER ITALIAT

Pemp eus brudeta kontadennou

Boccaccio

tennet eus an " Dekamerone "

EUL LEVR EVIT C'HOARZIN !

PRIZ (DRE AR POST) : 5 LUR

NOTENN. — o veza n'eo ket al levr-se da lakaat etre
daouarn an dimezelled yaouank, ne vo kaset da nep den
nemet war e c'houlenn.

GWALARN
KELC'HGELAOUENN
LENNEGEL MIZIEK

RENET GANT

ROPARZ HEMON

KOUMANANT-BLOAZ

30 LUR

(BROIQU ESTREN : **35 LUR**)

RENEREZ HA MEREREZ :

BOITE POSTALE 75, BREST

(C. C. 96-38, RENNES)

PRIZ : **3 LUR**